

欽
定
全
唐
文

欽定全唐文卷三百九目錄

新文藝出版社藏書

孫逖二

授褒信郡王璆宗正卿制

授濮陽郡王徹宗正卿制

授廣武郡王承宏光祿卿制

授韋珙光祿卿制

授崔惠童衛尉卿豆盧建太僕卿制

授王斛斯太僕卿仍兼安西都護制

授王昱太僕卿制

授李林宗太僕卿制

授竇鏐等太僕卿制

授杜希望鴻臚卿攝御史中丞制

授韋恆太常少卿制

授李林宗太常少卿制

授李岫衛尉少卿制

授鄭子獻太僕少卿制

授楊先司農少卿仍東都留守制

授王迴質祕書監韋廉起居郎制

授牛仙客殿中監制

授宋渾將作少匠制

授翟璋等將作少監制

授司馬利賓等著作郎制

授劉瑗等國子祭酒制

授裴巨卿國子司業張九皋尚書職方郎中制

授王斛斯守左金吾衛大將軍兼范陽大都督府

長史制

授張元逸明威將軍守右衛將軍制

授吳王祗等右衛將軍制

授蓋嘉運金吾衛將軍兼北庭都護制

授元環右監門衛將軍制

授趙惠琮雲麾將軍守左監門衛將軍仍兼知內

侍省事制

授王斛斯宣威將軍守右羽林軍將軍制

授彭元昭右羽林軍將軍制

授曹王弼左武衛將軍制

授郭元昇右武衛將軍守右衛將軍鄭繼先右武

衛率制

授裴倩右武衛將軍制

授信安王禕太子太師制

授崔琳太子少保制

授賀知章等太子賓客制

授孟溫太子賓客崔璘太子右庶子制

授裴元初太子賓客制

授王暉銀青光祿大夫守太子詹事制

授許王瓘太子詹事王暉守同州刺史制

授盧詢太子詹事制

授程伯獻光祿大夫太子詹事李仲思光祿大夫

國子祭酒制

授殷承業太子左諭德王利涉國子監丞制

授甘暉太子贊善大夫元嘉福戎州長史制

授蕭誠太子左贊善大夫仍前幽州節度驅使制

授韋汭等太子贊善大夫制

授殷彥方等王傅制

授郭元融寧王府諮議制

授李夷吾榮王府諮議制

授王積薪慶王友制

授崔隱甫河南尹制

授崔希逸河南尹制

授裴寬河南尹裴伷先蒲州刺史制

授陸操太原少尹制

授鄭巖萬年縣令制

授徐鍔洛陽縣令制

授樊象藍田縣令制

授源復等諸州刺史制

授韓朝宗等諸州刺史制

授元彥沖等諸州刺史制

授崔翹等諸州刺史制

授宋樽等諸州刺史制

授張敬輿等諸州刺史制

授翟璋等諸州刺史制

授秦昌舜等諸州刺史制

授劉體微等諸州刺史制

授裴煒等諸州刺史制

授魏哲等諸州刺史制

授李昇朝等諸州刺史制

授李良等諸州刺史制

欽定全唐文卷三百九

孫逖_二

授褒信郡王璆宗正卿制

門下公族之任得才則難舉親而官選舊惟允銀青光祿
大夫殿中監上柱國褒信郡王璆雅正惟恭虛懷敏達近
屬藩翰中朝羽儀無競維人不矜於貴分克勤於位每効
於忠公敦敘是司疇咨所屬宜居六尚之職以副九宗之
委可宗正卿

授濮陽郡王徹宗正卿制

門下宗卿設位邦族是司必擇親賢以光名器金紫光祿大夫行太僕卿員外置同正員上柱國濮陽郡王徹清貞履道淑慎持身行無越思動不踰矩以才從政於歷官而則淡以地推恩在同姓而爲近敦敘之任疇咨所難宜受寄於本枝更遷榮於列棘可行宗正卿散官勲如故

授廣武郡王承宏光祿卿制

門下銀青光祿大夫行房州別駕員外置同正員廣武郡王承宏地在維城慶延分土頃乖周慎因從降黜捨其公犯用申猶子之恩復其舊資俾踐列卿之秩可光祿大夫

光祿卿員外置同正員

授韋珙光祿卿制

門下銀青光祿大夫慶王傅員外置同正員上柱國扶陽郡開國公韋珙衣冠耆舊德行名賢吏術該通嘗聞理劇道心遠曉雅好攝生一在優閒久淹年序怡和自保志力猶強宜有命於移官俾承榮於列寺可光祿卿員外置同正員勲封如故

授崔惠童衛尉卿豆盧建太僕卿制

門下尚主之恩允歸於人秀睦親之典必洽於朝榮駙馬

都尉崔惠童豆盧建等在人物士林在勲華忠緒行能雙
美才貌兼資善道自修今名無忝錫之姻好已承築館之
榮寵其章服宜列象河之位惠童可銀青光祿大夫衛尉
卿建可銀青光祿大夫太僕卿並員外置同正員

授王斛斯太僕卿仍兼安西都護制

門下安西都護王斛斯將略稱多忠誠克著頃膺邊寄頗
洽人心間歲以來頻有騷警能清寇虐不頓甲兵契軍國
之遠圖得攻拒之良術有勞懋賞自昔如茲宜踐列卿之
位俾兼并護之職可太僕卿員外置同正員兼安西都護

等如故

授王昱太僕卿制

門下列彼九卿正於羣僕允膺茲命必藉兼才正議大夫
守太原尹北都留守使持節河東道諸軍節度營田副大
使知節度事兼採訪處置使攝御史中丞上護軍賜紫金
魚袋王昱韜是明斷資其理識成務有餘奉公不撓自持
軍律兼委使車能啓刑書以懲貪吏到官未幾除惡已多
類能則然賞善宜及俾升榮於左馭仍受任於北京可守
太僕卿兼大原尹餘如故

授李林宗太僕卿制

門下中大夫守太常少卿上柱國李林宗行能溫厚器識
該浚清白奉公常聞吏術恭謙應物更表身謨自亞河海
亟移星歲友于之愛實掌樞衡致美之心俱懷退讓遠嫌
滋久舉滯當遷宣正位於名卿俾欽承於密命可太僕卿
散官勲如故

授竇鶚等太僕卿制

門下申以婚姻必求於才地制於祿位兼取於親賢竇鶚
等克嗣高門能修善道有溫恭之言行兼美秀之形神勲

華之緒既連於舊戚選尚之恩更諧於新禮俾升榮秩仍錫寵章可依前件

授杜希望鴻臚卿攝御史中丞制

門下賞以懋功官無虛授所貴天秩斯爲國典朝議郎守太僕少卿員外置同正員使持節都督鄴州諸軍事兼鄴州刺史隴右節度副使仍知經略支度營田等留後事賜紫金魚袋杜希望器能開敏才略雄渙識韜鈴之大綱知戰守之良術頃令討罪爰委行師不憚艱危常先士卒恩威必備權變多方狂寇已清堅城又克疇庸是屬舉善攸

歸俾膺超等之榮仍列上卿之位可通議大夫守鴻臚卿員外置同正員攝御史中丞餘如故

授韋恆太常少卿制

門下朝議大夫守給事中鄭縣開國男韋恆神清氣爽識遠心微周才可以求備雅望期於必復自登近密已積歲年淑慎有恆閒和易退奉常之亞稱職爲難空回夕拜之榮俾在春官之屬可守太常少卿散官如故

授李林宗太常少卿制

門下朝議大夫守衛尉少卿上柱國李林宗寡言敏行清

節令名能執謙沖之心以成友悌之美自亞九卿已淹四
歲舉必以類既承拜命之榮恩則由中俾佐奉常之職可
守太常少卿

授李岫衛尉少卿制

門下朝議大夫行祕書丞上柱國清水縣開國伯李岫說
禮敦詩資忠履孝勵清修而立節包麗則以爲文曩者輟
務仙臺移官祕府一從閒退七變星霜父在樞衡固守范
宣之讓謙沖自牧足鎮於浮躁而進用無黨須歸於至公
宜承特命之恩俾踐亞卿之職可守衛尉少卿散官勲如

故

授鄭子獻太僕少卿制

敕朝議郎前行宗正卿賜紫金魚袋鄭子獻業繼簪裳地
連姻戚早昇班序累効忠勤公族之司頃居亞列僕臣之
任宜復舊資可守太僕少卿員外置同正員散官勲如故
授楊先司農少卿仍東都留守制

門下朝議大夫守太僕少卿上柱國朱陽縣開國男楊先
精勤從事堅白在公任以器能位於河海出納之恡朝廷
所難宜迴職金之府更膺搜粟之寄可守司農少卿仍東

都留守

授王迴質祕書監韋廉起居郎制

門下守諫議大夫王迴質茂學純行國之耆耄左補闕韋廉清才敏識人之英秀藩維日就實賴於師資軒陛晨趨有光於侍奉各施於用皆著其勤宜拜藏書之府俾遷紀言之職迴質可祕書監廉可起居郎

授牛仙客殿中監制

門下乃立御府其代天工必在信臣以兼重寄銀青光祿大夫太僕卿朔方節度兼開內道支度兼管營田鹽池押

諸蕃部落副大使兼採訪處置使羣牧都使監牧支度營田閑廐宮苑五坊等使攝御史大夫上柱國隴西縣開國子牛仙客忠公有度亮直無私長才爲萬里之城沈略乃百夫之禦頃持節鉞嘗鎮河湟兵器惟精邊人咸賴出則靖國方資五利之功入則訓騶宜修六尚之職可殿中監散官勲並如故

授宋渾將作少匠制

門下朝議大夫前守諫議大夫上柱國襄國縣開國男宋渾明敏自然通和足尚承舊德之餘訓有多才之令名喪

制久除朝章式敘宜升髦士之列俾亞上卿之任可守將作少匠散官勲封如故

授翟璋等將作少監制

門下滑州刺史翟璋等精勤立志果斷雄才有吏道之能名是郎官之俊選掄材考行用掌百工之事宰邑臨人佇爲四方之則可依前件

授司馬利賓等著作郎制

敕朝議郎行祕書省著作佐郎司馬利賓等或富於學業或精於吏能公清爲潔已之資詞賦有成名之美舉其同

術宜並拜於軒墀甄其異用俾分官於儒館可依前件

授劉瑗等國子祭酒制

門下名器所歸必徵於才實進用之序亦憑於歲年邠王
傳上柱國豐縣開國男劉瑗等備聞素行累踐清資佩服
文儒周旋禮讓効官惟謹考績皆淡以類而遷既有均於
平施至公斯在亦何患於後時宜悉虛懷各從分職可依
前件

授裴巨卿國子司業張九皋尚書職方郎中制

門下朝議大夫著作郎裴巨卿厚德馴行性與淳和朝請

大夫殿中丞上柱國張九皋雅量清才體合明允咸推遠
識皆有令名能勵節於朝廷將致美於兄弟詩書是悅宜
當六學之師章奏惟難更擅一臺之妙巨卿可國子司業
九皋可尚書職方郎中散官勲如故

授王斛斯守左金吾衛大將軍兼范陽大都督府

長史制

門下左羽林大將軍兼范陽大都督府長史充范陽節度
經略支度營田副大使王斛斯推誠勵節好勇能謀政必
有經舉無遺策久鎮幽朔勤修訓練既摧凶以制勝亦懋

賞以酬庸而環衛之職金吾尤重宜承後命以寵中權可
守左金吾衛大將軍兼范陽大都督府長史餘如故

授張元逸明威將軍守右衛將軍制

門下中大夫守光祿寺卿員外置同正員賜紫金魚袋張
元逸幹蠱於君謙沖自下外姻之旅眾望攸歸寘彼周行
備聞聲實委之環衛尤切腹心宜易位於右卿俾呈能於
真將可明威將軍守右衛將軍勲賜如故

授吳王祗等右衛將軍制

門下左衛將軍吳王祗等國之近屬朝之多士或同班警

衛有避於天倫或列位周行已淹於歲序各移官命用廣
朝恩可依前件

授蓋嘉運金吾衛將軍兼北庭都護制

門下右威衛將軍兼北庭都護蓋嘉運百夫稱勇萬里將
軍智則有謀忠而能毅頃者狂寇作梗銳師深入用奇以
往決勝而歸式酬其庸言命之賞宜增秩於中尉仍握兵
於外城可左金吾衛將軍兼北庭都護餘如故

授元環右監門衛將軍制

敕右監門衛中郎將元環衣冠濟業言行資身地在通姻

人稱懿戚徵於舊典洽以新恩宐有命於移官更增榮於
賜服可依前件

授趙惠琮雲麾將軍守左監門衛將軍仍兼知內
侍省事制

門下中大夫守內侍上柱國賜紫金魚袋趙惠琮素韞智
謀早周慎密頃今銜命委以臨戎旣逾險而深入亦乘危
而苦戰遂清狂寇且振邊威不有賞功將何勸善宐列爪
牙之任仍眞印綬之榮可雲麾將軍守左監門衛將軍仍
兼知內侍省事勲如故

授王斛斯宣威將軍守右羽林軍將軍制

門下大中大夫守太僕卿員外置同正員上柱國賜紫金魚袋王斛斯智謀宏遠識量沖澁位列名卿才優良將頃膺朝寄作扞邊陲惠威有孚羗戎卽序念其勤苦旣返旆於西城任以腹心宐典兵於北禁可宣威將軍守右羽林軍將軍勲賜如故

授彭元昭右羽林軍將軍制

門下中大夫使持節都督洮州諸軍事守洮州刺史同隴右節度副使上柱國賜紫金魚袋彭元昭久統邊事咸推

武才必也好謀豈唯有勇遞遷中外方表幹能宜典禁兵以膺重寄可右羽林軍將軍

授曹王弼左武衛將軍制

門下行左清道率府曹王弼藉慶宗枝升榮官序頗有公累終非自作曾是黜官亦云累載宜叶睦親之道俾遷仍舊之職可左武衛將軍勲如故

授郭元昇右武衛將軍守右衛將軍鄭繼先右武衛率制

門下將作少匠郭元昇忠厚資貞有聞於行守太子家令

鄭繼先衣冠濟業不隕其名各在官次頗淹年序宜分職
於五校俾增榮於兩宮元昇可右武衛將軍守右衛將軍
繼先可右武衛率勲如故

授裴倩右武衛將軍制

門下前守右武衛將軍裴倩韞是忠勇資其智謀久樹邊
功備詳戎事疆場有警方期於効節金革無避宜後於奪
禮可起復守右武衛將軍餘如故

授信安王禕太子太師制

門下傳導元子師長庶寮必在正人無非舊德太子少師

上柱國信安王禕宗室良翰朝廷碩老踐忠公而立節體
明肅而成用頃膺大任頻總中權掌夏司春是爲六官之
長戢兵禁暴何止萬人之敵睦親尚齒念舊錄功宜優天
秩之榮俾極宮臣之位可光祿大夫守太子太師勲封如
故

授崔琳太子少保制

門下貞萬國者必在於元良教三善者是求於端士銀青
光祿大夫守刑部尚書上柱國清河郡開國公崔琳中和
稟氣厚德資身雅言有章明議能斷標禮樂於先進効忠

公於大官堅白不渝芬芳自久緝熙秋典用簡於心調護
春宮更難其選宜取才於六職俾齊名於二傅可守太子
少保

授賀知章等太子賓客制

門下調護儲宮典司延閣必在舉德固無虛授慶王侍讀
銀青光祿大夫祕書監員外置同正員賀知章等衣冠耆
舊詞學宗師或恬淡風流獨擅東南之美或清貞介特是
稱江漢之英負當朝之令名有錫類之純行頃令教導久
侍藩維善利則多寵章宜及方之四老用列賓友之任綜

彼三墳俾在圖書之府可依前件

授孟溫太子賓客崔璘太子右庶子制

門下重位高官必歸於舊德中朝內外亦在於更遷金紫
光祿大夫使持節同州諸軍事行同州刺史上柱國魯國
公孟溫性與嚴明才優政理朝請大夫使持節魏州諸軍
事守魏州刺史上柱國安平縣開國伯崔璘清而率下正
以持身或累登要劇聲謠夙著或頻更刺舉歲序滋深出
入兼施器能皆適宜膺調護之選俾踐宮坊之任溫可太
子賓客璘可太子右庶子散官勲封如故

授裴元初太子賓客制

門下宮朝所重賓友爲先誰其往諧必也求舊通議大夫
守太僕卿上柱國聞喜縣開國侯裴元初已勵行全存誠
好德中和應物豈終食而違仁至理爲心每忘筌而合道
早升清要累踐崇班能慮始以思終不近名而過實宜膺
端士之選以佐元良之貞可太子賓客勲封如故

授王暉銀青光祿大夫守太子詹事制

門下儲闡掌事端尹命官疇咨所難慎擇斯在雲麾將軍
前左千牛衛將軍上柱國太原郡開國公王暉衣冠貴緒

人物通才善自謀身見推於賢戚凡所効職必聞於中外頃緣謝病今則有瘳舉其滯淹用升於朝列甄其望實宜首於宮僚可銀青光祿大夫守太子詹事勲封如故

授許王瓘太子詹事王暉守同州刺史制

門下宮僚之首必擇正人邦圻之內實資良牧銀青光祿大夫祕書監上柱國許王瓘文儒致位所謂宗英銀青光祿大夫守太子詹事上柱國太原郡開國公王暉言行立誠是稱親懿常以善而爲樂每執謙而忘倦從政已多議能惟允彈違是屬宣肅事於東朝理劇尤難俾安人於左

輔瓘可太子詹事曄可使持節同州諸軍事守同州刺史
散官勲如故

授盧詢太子詹事制

門下大中大夫使持節華州諸軍事守華州刺史上柱國
盧詢才標公望器重士林頃寄分憂備彰聲實近聞稱病
已歷旬時雖從政之能猶堪於卧理而攝生之道終忌於
勞神宜增班秩之榮俾在優閒之地可太子詹事員外置
同正員

授程伯獻光祿大夫太子詹事李仲思光祿大夫

國子祭酒制

門下準繩儲家師長國庠爰擇親賢用諧任寄鎮軍大將軍行右金吾大將軍兼弩營使上柱國廣平郡開國公程伯獻勲臣業固幹略有餘雲麾將軍守右武衛大將軍上柱國安平郡開國公李仲思宗子地華行能無悔咸推雅量早踐通班或甫及高年或近嬰微疾營校之任久以煩卿優閒之職期於遂性宜膺並拜俾在兩宮伯獻可光祿大夫行太子詹事仲思可銀青光祿大夫國子祭酒員外置同正員

授殷承業太子左諭德王利涉國子監丞制

門下朝議大夫宗正少卿殷承業行宗正丞王利涉等咸以器能各升班序克勤於事不忝其名九族之司旣無取於異姓兩宮之地宜有命於分官承業可太子左諭德利涉可國子監丞

授甘暉太子贊善大夫元嘉福戎州長史制

敕主客員外郎甘暉前代州長史元嘉福等或遊心淡泊常有慕於幽人或從事劬勞頗知名於邊郡各循班列仍度器能宜序東朝之列俾遷外藩之佐暉可守太子贊善

大夫嘉福可守戎州長史散官如故

授蕭誠太子左贊善大夫仍前幽州節度驅使制
敕朝議郎恆州司馬隨軍副使幽州節度驅使上柱國借
緋魚袋蕭誠早標明敏久著聲名詞翰推工才能適用頃
從戎幕當募征夫宜遷翊贊之榮仍効撫綏之術可守太
子左贊善大夫依前幽州節度驅使仍專檢校管內諸軍
新召長遠往來健兒事

授韋洎等太子贊善大夫制

門下朝散大夫守忠王府諮議參軍韋洎等各有才器備

彰名實頃膺朝選久在王門儲貳作貞旣承於新令慶賞
行惠必先於舊僚宣叶典章用增班秩

授殷彥方等王傅制

門下中散大夫守忠王府長史兼侍讀上柱國殷彥方等
朝廷雅望人物周才或聚學沖淡或屬詞清遠頃膺授擇
皆侍藩維教導之功旣聞於日就溫文之德遂涉於春儲
國有典章義存褒賞宣進秩於高位俾升榮於近傅可依
前件

授郭元融寧王府諮議制

敕典軍郭元融名列戎昭官升王邸頗經歲序克著勤勞
宜更文武之職俾在諮謀之任可朝議郎守寧王府諮議
參軍

授李夷吾榮王府諮議制

敕朝議郎守青州司馬李夷吾門擅文儒才推幹理從事
惟謙在官必達貳於郡職已聞康海之謠官彼王門宜膺
背淮之選可守榮王府諮議參軍散官如故

授王積薪慶王友制

門下朝散大夫前行右領軍衛長史王積薪博藝多能精

心敏識久從班秩頗著勤勞俾遷環衛之司宜在從車之列可慶王友餘如故

授崔隱甫河南尹制

門下三川作都四方取則任能而理求舊爲先銀青光祿大夫守太子賓客上柱國崔隱甫冠冕碩人朝廷偉量士林之秀公望攸歸直而能溫寬以濟猛累踐臺閣備彰德器輦轂之務風化所急鎮茲雅俗俟彼正人宜受任於兼官俾重臨於故府可兼河南尹餘如故

授崔希逸河南尹制

門下制天秩者必在於賞功尹王都者是先於舉德朝散大夫守左散騎常侍持節河西節度經略支度營田九姓長行轉運等副大使知節度使判涼州事赤水軍使上護軍攝御史中丞賜紫金魚袋崔希逸深識宏才清標雅致明無不達懸朗鑑於胃懷斷則有餘錯盤根於掌握頃膺邦選爰委兵權能行上將之謀略獻西師之捷寵其命服俾叶於酬庸鎮彼神州更期於表則可銀青光祿大夫河南尹勲如故

授裴寬河南尹裴佖先蒲州刺史制

門下風雨所交是稱中土山河之寶斯爲近服有能俾乂
其在遞遷中大夫使持節蒲州諸軍事蒲州刺史上柱國
裴寬高朗多才懷必割之良器銀青光祿大夫使持節絳
州諸軍事絳州刺史上柱國翼城縣開國伯裴卬先貞廉
守道秉不凋之勁節或累拜清秩或頻更劇務三汾作郡
各著聲謠八使觀風咸推課最類能而舉僉議攸歸宜受
任於洛都更移官於蒲坂寬可守河南尹卬先可使持節
蒲州諸軍事蒲州刺史散官勲各如故

授陸操太原少尹制

門下守洛陽縣令陸操才膺利用官歷清資當斷不疑在
公必濟京兆之亞夫官之劇旣馳名於洛邑宜佐理於汾
州可守太原少尹散官如故

授鄭巖萬年縣令制

門下中大夫行尚書刑部郎中上柱國鄭巖形神俊秀理
識通明標幹術於公方飾文詞於吏道累登華省嘗典劇
曹宜遷取則之邑更展撥煩之用可行京兆府萬年縣令
授徐鶚洛陽縣令制

門下司封郎中徐鶚業繼文儒才優斷割明而不滯幹則

有成五等是司已傳名於臺妙四方之會宜展用於京劇
可河南府洛陽縣令

授樊象藍田縣令制

門下行京兆府司錄參軍樊象發跡詞場馳名吏職克勤
於位皆著其能據彼神州旣彰人譽宰於近縣俾叶時須
可京兆府藍田縣令

授源復等諸州刺史制

門下大中大夫使持節徐州諸軍事守徐州刺史上柱國
源復等雅才清識踐行立名政表於良康歌聞於是賴或

金史卷之二十一
三十二
歲年滋久必在於更遷或風俗異宜各期於適用俾膺俞
往以副僉諧可依前件

授韓朝宗等諸州刺史制

門下朝請大夫使持節都督洪州諸軍事守洪州刺史上
柱國長山縣開國伯韓朝宗等開濟雄才宏深雅量或累
升清要常展用於高資或頻膺刺舉久馳名於列郡振其
淹滯任以器能宜遞遷於遠近俾更踐於中外可依前件
授元彥沖等諸州刺史制

門下理人之吏深識於數易度才而遷必憑於久次朝議

大夫使持節都督越州諸軍事守越州刺史元彥冲等幹
能自達政術有聞化行一郡並逾四稔克慎終始不憊名
實空有遞遷更膺分命書不云乎三載考績黜陟幽明舊
章則然古制斯在今所進轉皆爲限約並須畫一無相奪
倫庶懲欲速之人將致有常之化凡厥共理宜悉其心可
依前件

授崔翹等諸州刺史制

門下中散大夫前使持節滑州諸軍事守滑州刺史上柱
國崔翹等詞學爲門貞廉作吏並久從官序能效公心禮

及旣祥皆聞於俯就才有所適宜在於分官可依前件

授宋樽等諸州刺史制

門下朝議大夫前使持節仙州諸軍事守仙州刺史上柱國宋樽等或郡國良吏或朝廷吉人咸勵厥躬克勤於位循名考行揆務量能宜受命於分官俾呈才於庶績可依前件

授張敬輿等諸州刺史制

門下中大夫使持節鄭州諸軍事守鄭州刺史上柱國張敬輿等克修名操久踐衣冠咸適用於當時各効能於

列郡風謠具舉歲序皆渙曾是移官用叶平分之義或因去職宜承並命之恩可依前件

授翟璋等諸州刺史制

門下中散大夫守將作少匠上柱國翟璋等名跡修謹藝能該博或累升清秩或久踐通班三年有成各呈才於外郡庶官無曠咸勵節於中朝重寄所難分憂是屬宜膺稍遷之舉用叶汝諧之命可依前件

授秦昌舜等諸州刺史制

敕中散大夫守常山郡太守秦昌舜等器能足用政術多

方項在列藩皆聞致理或居官已久或去職當遷長史缺
官中朝慎擇宜膺並命更委親人可依前件

授劉體微等諸州刺史制

門下中大夫前使持節鄭州諸軍事守鄭州刺史上柱
國博陽縣開國男劉體微等器能具舉言行兼資嘗踐郎
官頻更吏職令名無替成績有聞宜受任於藩邸俾榮遷
於郡國可依前件

授裴煒等諸州刺史制

門下中大夫前守安定郡太守裴煒等位分中外名著朝

廷或課績多年或招輯成政禮云終服官以授人舊章斯
在新命宜及俾膺藩岳之任更展循良之稱可依前件

授魏哲等諸州刺史制

門下前歙州刺史魏哲等以能入仕以廢疾官項曾罷歸
亦云淹久勿藥有喜旣善攝生之術度材而用宜承舉滯
之恩可依前件

授李昇朝等諸州刺史制

門下亳州刺史李昇朝等並膺時選俾踐官資才器則殊
行能皆著或居喪之禮俯就於外除或同氣之親有妨於

聯事或近停郡職或久滯王門宜各稍遷俾從分命可依前件

授李良等諸州刺史制

門下守太子中允李良等早推言行兼有幹能從官必聞服勤斯久分憂是屬慎擇爲難宜副恤人之心俾諧良吏之選可依前件

欽定全唐文卷三百十目錄

孫逖 三

授王忠嗣同隴右節度副使制

授馬元慶河西節度副使制

授李林甫兼河西節度等使制

授盧朔萊州長史薛重輝括州長史制

授楊行審靈州長史仍充六城水運使制

授楊戩華州長史制

授韋景遠犍爲郡長史韋履言仁壽郡長史制

金定公集卷三十一
授李踐由安州別駕李惟可鄂州別駕制

授李裕鄧州別駕魏浼德州別駕制

授蕭誠宏農郡別駕制

授李廷珍沂州司馬制

授李庭芝絳州司馬制

授梁炫郢州司馬制

授嚴正誨博州司馬制

授韋由太原縣令程若水守太子中允制

授徐鈞南海縣令制

授崔綸郛縣令制

贈廢太子承乾恆山愍王制

封李林甫晉國公牛仙客邠國公制

張均襲封燕國公制

封李岫長樂縣侯制

授牛仙童內謁者監制

封牛仙客妻王氏邠國夫人制

開元二十七年冊尊號大赦天下制

天寶三載親祭九宮壇大赦天下制

立忠王爲皇太子制

封高都公主等制

封永寧公主制

封平昌公主制

改尚書洪範無頗字爲陂字敕

升風伯雨師爲中祀敕

誠勵吏兵部侍郎及南曹郎中敕

誠勵吏部兵部禮部掌選知舉官等敕

誠勵兵吏部兩司敕

遣榮王琬往隴右巡按處置敕

令嗣鄭王希言分祭五嶽敕

令關內諸侯州長官祭名山大川敕

令天下寺觀修功德敕

停京都檢校僧道威儀敕

禁斷寒食雞子相餉遺敕

欽定全唐文卷三百十

孫逖 三

授王忠嗣同隴右節度副使制

門下隴右破吐蕃跳盪功專知節度行軍兵馬使遊擊將軍守右威衛翊府左中郎將賜紫金魚袋王忠嗣出自將門習於軍政智謀足用材藝超倫頃在河隴備彰誠節持兵所向料敵無遺挫其侵軼之師收其要害之地念切斯在議賞攸歸宜復舊官置同正員仍同隴右節度副使依前專知兵馬先有勲封並宜如故

授馬元慶河西節度副使制

敕雲麾將軍右驍衛將軍員外置同正員幽州節度副使
上柱國馬元慶名重武臣才優將略有剛勇以制敵能廉
幹而成務河湟作鎮戎狄是虞旣資攻守之術宜佐軍州
之任可充河西節度副使判涼州長史兼赤水軍副使仍
都知兵馬使餘如故

授李林甫兼河西節度等使制

門下天討有罪未可去兵帝賚良弼自資決勝金紫光祿
大夫兵部尚書兼中書令持節經略支度營田大使知節

度事集賢院學士修國史上柱國晉國公李林甫高操命
代特秀生人公忠爲百度之貞文武成萬邦之憲自登上
相兼委中權克致時和且聞戎捷踰隴之外已恢帷幄之
謀涉河而西更是輔車之勢欲懲猾夏必在夾攻宜以三
事之謨遙制兩軍之律可兼充河西節度經略支度營田
長行轉運九姓等使節度赤水軍事仍判涼州事餘並如
故

授盧朔萊州長史薛重輝括州長史制

門下朝散大夫行太原府太谷縣令容城縣開國子盧朔

朝請大夫行太原府榆次縣令薛重輝等咸以班列遷於
令長雖恭所職或異其能工則度材人無求備宜從近邑
俾佐遠藩朔可行萊州長史重輝可行括州長史散官如
故主者施行

授楊行審靈州長史仍充六城水運使制

門下朝散大夫守涼州都督府司馬河西轉運判官柱國
楊行審雅推幹術兼有權謀頃在武威克修官政類能而
舉宜增郡佐之秩從帥而遷仍統軍城之務可守靈州都
督府長史仍充六城水運使散官勲如故

授楊戩華州長史制

門下岐州司馬楊戩修身自久從政亦淹凡所效官皆聞
著稱三輔之郡貳職爲難宜易務於汧岐俾遷榮於河華
可華州長史散官如故

授韋景遠犍爲郡長史韋履言仁壽郡長史制

門下益州蜀縣令韋景遠郫縣令韋履言等各因常調俱
在親人雖清白自持而方圓未適使者所奏應非百里之
才官政式殊俾佐六條之職景遠可行犍爲郡長史履言
可行仁壽郡長史

授李踐由安州別駕李惟可鄂州別駕制

門下朝議大夫前使持節房州諸軍事守房州刺史上輕車都尉李踐由朝議大夫行蘄州司馬護軍李惟可等出自士林頻遷官序或方圓異用道有變通或昆友同官法宜迴避俾從新命用協舊章踐由可守安州都督府別駕散官如故惟可可鄂州別駕官勲如故

授李裕鄧州別駕魏滉德州別駕制

門下正議大夫前使持節泗州刺史上柱國

闕一字

山縣開

國子李裕朝議大夫前使持節泗州刺史上柱國開國男

魏滉等咸資舊德早踐通班頃坐微瑕因從免職賢哲之後可以勸能邦國之功期於補過裕可行鄧州別駕滉可守德州別駕勲封如故

授蕭誠宏農郡別駕制

敕朝請大夫南陽郡長史員外置同正員上柱國蕭誠早因才藝久踐榮班頃涉微瑕未爲深累佐郡之職冗員頗多既有命於省官俾稍遷於近服可守宏農郡別駕散官如故

授李廷珍沂州司馬制

敕朝議郎行右領軍長史李廷珍爰以疇人遂居先職不修其任是曠於官歷象之司旣非適用海沂之佐俾効所能可行沂州司馬員外置同正員

授李庭芝絳州司馬制

門下行櫟陽縣令李庭芝行能通敏政術優長有士族之令名是王畿之良吏在官旣久成效則多宜佐雄藩俾增榮秩可行絳州司馬散官如故

授梁炫郢州司馬制

敕播州司戶參軍員外置同正員江南西道採訪使判官

梁炫才堪應物累則因人近佐澄清頗彰勤苦以茲補過
因可收長空遷貳郡之榮式允連率之薦可郢州司馬員
外置同正員

授嚴正誨博州司馬制

門下朝散大夫行司農寺丞攝殿中侍御史專知太倉出
納使借緋魚袋嚴正誨頗有吏能累遷官守況所効職必
聞其政出納之吝或未當才邦國之功期於佐理可博州
司馬借緋魚袋如故

授韋由太原縣令程若水守太子中允制

門下朝議大夫守太子中允韋由太常丞長清縣開國男程若水等或業擅鄉族恩延將相咸以人才累升官敘北京理劇東朝駁議宜膺並命以叶類能由可守太原縣令若水可守太子中允散官如故

授徐鈞南海縣令制

敕行晉州神山令徐鈞幹以立身果於從政頗更所職頗効其能言念遠人實資良吏既有使臣之薦宜遷宰邑之榮可廣州南海縣令

授崔綸郿縣令制

敕益州大都督府倉曹參軍崔綸頃爲郡掾兼佐軍麾清
幹有聞公勤亦著名當歲調才應時須宜遷宰邑之榮式
允使臣之薦可益州郫縣令

贈廢太子承乾恆山愍王制

門下理天下者必宏於在宥厚仁德者莫尚於追遠故廢
太子承乾昔在先朝長陷淩過因是殛竄至於淪沒雖臣
子之罪義則不私而骨肉之親情則無絕況年代浸遠興
廢宣闕言念往時已申公葬將崇後命是錫王章式遵仍
舊之封更表易名之諡可贈恆山愍王

封李林甫晉國公牛仙客邠國公制

門下勸賞者國之端旣著酬庸之典俾彰爲善之制中書
令李林甫天實挺生鬱爲良佐工部尚書同中書門下三
品牛仙客國之名器特表忠臣能協乃心以成大政亟多
啟沃聞所未聞導以化源驅之仁壽遂令天下人盡知禁
斷獄數十殆至無刑所以比跡於成康高步於文景用人
多矣方獲我心況知無不爲釐革庶務損繁取要無往不
通古者褒有德賞有功今乃法懸不用德教云洽叶贊之
道功則茂焉宜共增封特開井賦林甫可封晉國公牛仙客

可封邠國公主者施行

張均襲封燕國公制

門下正議大夫行尚書兵部侍郎上柱國張均傳麓濟美
錫履承榮有構厦之瓊材爲刺鐘之利器嗣其先職且歷
緡雲之司纘乃舊封更開去社之國可襲封燕國公食邑
三千戶主者施行

封李岫長樂縣侯制

門下朝議大夫守衛尉少卿上柱國清水縣開國伯李岫
操清行潔學敏詞優克荷教忠之訓以成資敬之德屬交

神有慶布澤無偏賜級之榮旣覃於良相推恩之典宜及於名卿俾增錫土之封用表傳藏之業可封長樂縣開國侯食邑一千戶主者施行

授牛仙童內謁者監制

敕奉議郎行內侍省奚官局令護軍牛仙童修身淑慎從事忠公夙夜惟勤出入無悔不有賞善何以勸能宜進官榮且增章服可內侍省謁者監仍賜緋魚袋

封牛仙客妻王氏邠國夫人制

門下卿之內子實著於禮經國有舊章亦褒於淑德銀青

光祿大夫守工部尚書同中書門下三品持節朔方節度
兼支度營田鹽池押諸蕃部落副大使上柱國邠國公知
門下省事牛仙客妻瑯琊郡夫人王氏道膺圖史言成箴
誠賢明自遠柔惠兼資作配台臣能修壺教寵其車服已
膺命婦之榮錫以山川更表從夫之貴可封邠國夫人主
者施行

開元二十七年冊尊號大赦天下制

門下古之執大象建皇極者必稽彛訓而受鴻名所以應
乎天而順乎人也朕嗣守丕業二十七年受命之初旣膺

欽定全唐文

卷三百十

李通

八

明號尚多祇懼已謂崇高而公卿宗子緇黃耆艾披誠瀝
懇詣闕上言僉以爲乃聖乃文祖宗大烈恭惟纘服必在
欽承願以休名施於薄德抑而不許凡已十年爰迨於今
又陳八請上迫奉先之義下稽從眾之言將存至公不可
固拒以今日敬依大號曰開元聖文神武皇帝勉從典冊
良增感懼惟新之號既不私於朕躬非常之澤空並覃於
率土可大赦天下自開元二十七年二月七日昧爽以前
大辟以下罪無輕重已發覺未發覺已結正未結正繫囚
見徒常赦所不免者咸赦除之自開元以來諸色逋負疾

累人等咸從洗滌今許自新所司更不須以此爲累其有別敕停官及亡失爵者放歸不齒之類量加收敘左遷官及諸色流人並稍量移近處朕每念黎甿常恐失所救其困乏所貴及時比來諸州或有損處所在賑給例逼春農比及奏報又淹時月旣無救於懸絕亦何成於惠養自今以後每年至秋收後卽宜遣使分道宣慰仍與採訪使及州縣相知巡檢百姓間或有乏絕不自支濟者應須蠲放及賑給便量事處置訖奏聞天下百姓宜放今年地稅州縣官月料往緣錢有濫惡致損於人或徇私者多得罪亦

眾所以改支庸調將便公私聞百姓之間加織造若以此
勞弊又非得所自今以後宜各以當道所鑄充其月料古
者三載考績黜陟幽明允叶大猷以勸天下比來諸道所
通善狀但優仕進之輩與爲選調之資責實循名或乖古
義自今以後諸道使更不須通善狀每至三年朕當自擇
使臣觀察風俗有清白政理著聞者當別擢用宗廟致敬
必先於所在神人所依無取於非族濫惟至理用切因心
其應緣太廟五享宜於宗子及嗣王郡王中揀擇有德望
者今攝三公行事其異姓官更不須差攝其草澤間有殊

才異行文堪經國爲眾所知不求聞達者所在長官以禮
徵送皇太子璵男室並封授官邠王守禮寧王憲各與一
子三品官其內外文武三品已上賜爵一級四品以下各
加一階長公主及嗣郡王各與一子官郡主縣主各放一
子出身二王後及諸方蕃客室各賜物諸致仕官量與進
改依前致仕天下耆老百歲以下版授下州刺史婦人版
授郡君賜粟五石綿帛五段九十已上版授上州司馬婦
人版授縣君賜粟三石綿帛三段八十已上版授縣令婦
人版授鄉君賜粟兩石綿帛二段京城父老室共賜物三

千段道僧等賜物一萬匹天下觀寺六齋日宜轉經讀典
懲惡勸善以闡文教赦書有所未該所司類例處分率土
之內賜酺五日五嶽四瀆名山大川自古帝王忠臣義士
並令州縣致祭其有亡命山澤挾藏軍器百日不首復罪
如初宣布中外咸使知聞主者施行

天寶三載親祭九宮壇大赦天下制

門下九宮之祀百代莫修豈日給之不暇將明靈之有待
朕當晨君臨握圖纘業每聽政中是疇咨讜言觀書乙夜
以求故實勵精爲理三紀於茲上荷宗廟延祥克開厥後

下賴股肱叶德以致邕熙而麟鳳龜龍近遊郊藪蠻夷戎狄遠輸琬賁乘時來之休運恢皇王之遠圖是以圓丘方澤之儀升中告類之禮靡典不舉靡神不懷恭惟九宮明祀尚闕載深兢惕用建靈壇爰以元辰親執奠獻叶青陽發生之慶祈黔庶吉祐之福今至誠式展大禮云備瑞景和風神心如荅則無疆之祉豈獨在予非常之澤宜覃率土可大赦天下自天寶三載十二月二十五日昧爽已前大辟罪已下罪無輕重咸赦除之其十惡死罪造僞頭首謀殺攻劫及官典犯賊不在免限朕惟善政實在養人作

法務從於寬簡任事必量於齒力比者成童之歲卽掛輕徭旣冠之年便當正役憫其勞苦用軫予懷自今以後天下百姓以十八已上爲中男二十三已上成丁又任土作貢先標程式或非所有不免貿遷事旣非宜理難經久並應徵課稅及支遣諸色物或期程之間遲速非便並委所司與朝集使商量取便穩處置奏聞每歲庸調八月徵收農功未畢恐難濟辦自今以後延至九月三十日爲限諸軍行人遠爲邊捍修短之分雖有定期從役而終良深軫念其有陣亡及在軍亡歿骸骨未還鄉貫者宜令節度使

給官棧遞歸又防邊禦寇實爲艱勞貧戶單丁固宜存養
更令差遣去住難堪自今以後應差行人家無兼丁不在
取限自古聖人皆以孝理五常之本百行莫先移於國而
爲忠事於長而爲順永言要道實在宏人自今以後今天
下家藏孝經一本精勤誦習鄉學之中倍增教授郡縣官
長明申勸課百姓間有孝勤過人鄉閭欽伏者所由長官
具以名薦其有父兄見在別籍異居虧敗名教莫斯爲甚
特宜禁絕勿使更然並親歿之後亦不得令有分析郡縣
切勒令在惟行自今以後如有不友不恭傷財破產者宜

配磧西用清風教朕惟熙庶績博訪逸人豈唯振拔滯淹
以期於大用亦欲褒崇高尚將敦於薄俗虛佇之懷兼在
於此其有高蹈不仕遁跡邱園遠近如聞未經薦舉者委
所在長官以禮徵送又崇德追遠式問封墓用旌前列以
叶大猷自古聖帝明王名臣烈士陵墓有頽毀者宜令所
管量事修葺仍明立標記禁止樵採天下耆老百歲已上
賜帛五段粟三石八十以上帛三段粟二石仍於郡縣長
官存問給付亞獻太子諱宣賜物二千匹終獻慶王琮一
千匹正衣夾侍各五百匹親王各三百匹新封建郡王及

國公各一百匹賢妃三百匹長公主各三百匹公主各二百匹嗣郡王各一百匹中書門下三品竭心翊戴宏益實多各與一子官如先已授官量與一人轉内外文武官三品已上賜爵一級四品已下各加一階一品賜物七十匹三品已上六十匹五品已上四十匹六品已下二十匹諸節度使各賜物一百匹三京留守及二王後各八十匹採訪使各六十匹諸蕃客共賜二千匹其唐隆字避諱元年功臣締構之初竭其忠款錄功念舊情所不忘普恩之外更賜一階其身歿者各贈一官皇親五等已上及九廟子孫諸

親三等已上未有出身者並放出身其前資者選日稍優
與處分見任者更賜勲兩轉應天下賜酺三日赦書有所
未該者所司類例聞奏宣布中外咸使知聞主者施行

立忠王爲皇太子制

門下大寶曰位實在於丕承萬邦以貞由建於明兩朕嗣
守鴻業祗嚴永圖恭惟七鬯之主豈捨人神之望開府儀
同三司兼單于大都護河北河東道行軍元帥朔方軍節
度大使兼關內支度營田鹽池押諸蕃部落等大使上柱
國忠王璵天假聰明生知仁孝君親一致孝悌三成溫文

之德合於古訓敬愛之風聞於天下嘗亦視其所以察其所安考言有章詢事皆中知子者父允叶於元良以長則順且符於舊典宜膺擇嗣之舉俾受升儲之命可立爲皇太子仍取來月內擇日冊命所司准式主者施行

封高都公主等制

門下肅雍之範以成女德湯沐之賜爰著國章第十一女等生於公宮訓以師氏溫惠之性頗有夭姿圖史之學仍聞日就初笄甫及外館將歸宜因待禮之期式備疏封之典可依前件仍各實封一千戶主者施行

封永寧公主制

門下自昔帝女必建封邑典章不易等數猶存第十七女
幼而閒和長實徽懿引圖史以自鑒用肅雍而成德將擇
近日言遵下嫁宜承湯沐之賜以備車服之庸可封永寧
公主實食封一千戶主者施行

封平昌公主制

門下詩美肅雍遠著於風雅禮有封建久存於簡策第十
九女尚柔成德克順由衷稟於天然自有閒和之性訓以
師氏備詳圖史之學宜開湯沐俾叶典章可封平昌公主

食邑一千戶主者施行

改尚書洪範無頗字爲陂字敕

門下典謨旣作雖曰不刊文字或訛豈必相襲朕聽政之暇乙夜觀書匪徒閱於微言實欲暢於精理每讀尚書洪範至無偏無頗遵王之義三復茲句常有所疑據其下文並皆協韻唯頗一字實則不倫又周易泰卦中无平不陂釋文云陂字亦有頗音陂之與頗訓詁無別爲陂則文亦會意爲頗則聲不成文應由煨燼之餘編簡墜缺傳受之際差舛相沿原始要終須有刊革朕雖先覺兼訪諸儒僉

以爲然終非獨斷其尚書洪範無偏無頗字宜改爲陂庶使先儒之義去彼膏肓後學之徒正其魚魯仍宣示國學主者施行

升風伯雨師爲中祀敕

敕六氣不僣所以成歲百神咸秩必也正名況風伯雨師濟時育物蕃滋動植溥洽生靈厥有茂功當崇於昭報謂之小祀頗紊於彝倫去載諸星以爲中祀永言比義固合同昇自今以後其風伯雨師並宜升入中祀仍令諸郡各置一壇因春秋祭祀之時同申享祀用刊前典之謬以致

蒼生之福

誠勵吏兵部侍郎及南曹郎中敕

敕銓綜之司名器所屬苟虧審慎必有姦濫及今按詰其數頗多馬有害羣罪雖在於胥吏龜之毀櫝過亦由於主守其御史中丞楊慎矜所奏前後知銓侍郎及南曹郎官等忝効職司不能舉察合投嚴譴用肅慢官猶以久踐朝班夙昭人譽過而能改必在增修特宐寬宥俾自懲警

誠勵吏部兵部禮部掌選知舉官等敕

敕官邪則敗國賞僭則利淫自昔至言政之明誠朕祇膺

大寶豈忘兢業臨馭已來且踰二紀期大道之成化冀天下之爲公凡百卿士豈不協力而選舉之司委任尤重若名器失序則勸沮何施近者流外銓曹頗多淪濫有塵清議實紊彝章胥吏之徒雖則微賤仕進之路終爲厥初必澄源流無雜涇渭不慎於細其傷則多小旣不可不懲大亦不可不誠其吏部兵部禮部掌選知舉等官各宜飭勵當盡至公必須杜邪枉之門絕請托之路何止一變仍圖永清且銓綜九流必仗賢俊取諸賞鑒立斷可知何至淹時至稽團奏聞聞之後餘甲未終旣滯官曹長茲罪過舊

選未畢新格復修此乃因循實爲煩弊自今以後吏部選人三月三十日已前團奏事畢兵部二月內畢其流外銓及武學專委郎官恐不詳悉共爲取捨適表公憑每至留放之時皆就尚書侍郎對定既上下檢察庶在得人而覆車尚在殷鑒非遠法不可廢竑識朕懷

誠勵兵吏部兩司敕

敕設官分職將以奉法禁非實在上下叶心中外一德共熙庶績用絕姦源如聞百司頗皆寬縱遂令胥吏得以挾私近者兵部令史因令推鞠或在選曹增減文狀雖小人

之過則惟其常永言在官亦爲疎略朕今申之寬宥許以自新庶觀將來冀能効節至如兵吏兩司是掌衡鏡進趨者非一揆姦巧者亦百端推而言之或所未免無謂幽昧朕皆察焉各宜盡心靖恭爾位

遣榮王琬往隴右巡按處置敕

敕遏寇防邊在於有備興師訓卒用戒不虞隴右諸軍地當戎虜尤資振旅以壯邊威宜令隴右節度經略支度營田大使開府儀同三司兼京兆牧上柱國榮王琬自往隴右巡按處置庶宏廟略因達誠懷宜於關內及河東納資

飛騎並諸人中間召取健兒三五萬人赴隴右防捍立秋
末無事放還仍於當道軍將內銓擇一人與所由簡召應
給糧賜所司速作條例處分

令嗣鄭王希言分祭五嶽敕

敕歲之豐儉故係於常數天之感應實在於精誠頃者按
以陰陽求之推步至於今歲不合有年朕乃齋心妙聞懇
祈元德靈徵不遠丕應用彰果獲西成頗爲善熟蓋至道
儲祉惠於蒸人亦羣神叶贊錫以昭假宜令光祿卿嗣鄭
王希言祭東嶽太子詹事嗣許王瓘祭北嶽太常卿韋縚

祭西嶽衛尉卿嗣吳王祇祭南嶽宗正卿濮陽郡王徽祭北嶽所司卽擇日錄奏其四瀆及名山大川或遠近不同各委所由郡長官便擇吉日致祭務崇嚴潔以稱朕懷

令關內諸侯州長官祭名山大川敕

敕朕爲人上未嘗自逸每勤於政思致豐年而去冬以來雨雪微少竊恐春事有害農功是用齋心躬自申禱神歆允答甘澤遂流豈朕之微誠敢當丕應蓋天之鑒佑惠及生人詩不云乎無德不報昭賽之義豈可闕如其關內名山大川及有靈祠宜令所由長官擇日致賽務令豐厚各

盡誠潔以副朕懷

令天下寺觀修功德敕

敕道釋二門元通眾妙濟時育物皆有明徵是所依憑豈
忘尊奉其天下寺觀並令修功德用齊三聖之教以答百
靈之心宜副虛懷各陳至敬

停京都檢校僧道威儀敕

敕道釋二教必在護持須置威儀令自整肅徒眾既廣統
攝尤難更相是非却成煩弊自今已後京都檢校僧道威
儀事宜並停或恐先有猜嫌因此妄相糾訴所由亦不須

爲理

禁斷寒食雞子相餉遺敕

敕天地之德莫大於生成陽和之時先禁於卵殯比來流俗間每至寒食日皆以雞鵝鴨子更相餉遺旣行時今固不合然自今以後永宜禁止朕每思儉樸深惡浮華諸色雕鏤等已令變革其公私宴會比者多假果及樓園之類虛爲損耗競務矜誇亦宜禁絕有違者準今月八日敕